



傅雲公閣督

---



遺像



## 司督閣公略傳

司公督閣·英之北部蘇格蘭人也·生於西歷一八五四年·幼穎慧·試輒冠軍·長肄業於英厄丁堡大學畢業·得醫學博士學位·於前清光緒八年來奉·始設一簡單之施診所於小河沿·其時風氣未開·對於西醫皆乏信仰·就診者賴皆不起之沈疴·姑予試治·公皆以赤誠相待·盡心診療·次歲適值奉垣水災·病黎沿途·嗷嗷待哺·公目擊心傷·函致該國慈善會·募得巨款·從事賑濟·施

衣施粮·施錢施藥·省城及附近村民之得慶重生者何啻千百·復憫孤兒失教·乃創立私塾·收容遺孤·聘師教導·光緒十六年奉天府尹與公首倡捐款·協助醫院·院中規模因以日擴·公以博施濟衆·有賴本地人材·遂於光緒十七年招考學生數名·教授內外各科·以資贊助·此實爲我奉設立醫學之濫觴·公治病授課·日無暇晷·精神彌旺·心志益堅·光緒二十年中日失和·公赴營口設立紅十字會·醫治前敵負傷兵官二千餘名·和議告成·經直隸總督李公保獎三等雙龍寶星·光緒二十六年遭義和團之變·全院付之一炬·而公之心不少懈·亂定後·又募巨款·於光緒三十一年重建新院·較前益加擴充·日俄戰事起·在奉之日俄傷兵·賴公之醫治得活命者·爲數甚夥·宣統三年鼠疫發生·經東三省總督錫公聘公爲高等醫務顧問·一切防務·多賴擘畫·事後開萬國醫學會·遂被舉爲東三省研究會員·並蒙政府進獎三等第一寶星·是年英皇又特授爵士·並蒙總督錫公獎給金牌獎章·公鑒於本地醫學人材之缺乏·

因倡議興建完備之醫校。蒙東三省總督徐公撥款贊助。同時西人亦爭輸巨款。現時巍然矗立於萬泉河北岸之奉天醫科專門學校。遂於民國元年得告成立。初爲五年畢業。專收男生。嗣公以滿洲尤乏女醫師。因在英特捐巨款。擴充設備。招添女生。同堂授課。復提高學程。由五年改爲七年畢業。醫校之常年經費。及擴充特費。均賴公在國運籌謀劃。奔走勸募。耗神費力。勞瘁備至。而公當之無倦色。二十五年如一日。公之材高。公之愛大。而公之毅力尤足矜式。公在國於奔走校事之餘。復向英政府請求退還庚子賠款。移作中國教育之用。巡閱使張公嘉其服務熱誠。特請政府獎與三等嘉禾章。以爲外人之效忠於吾地者之勸。公體素健。向不言老。惟年近古稀。例須退職。遂於民國十一年循例退職。息影故鄉。東三省民衆戴公德厚。欽公志堅。於民國十四年迺釀資爲鑄銅像。立於校前。藉誌不朽。此十數年來。公名雖退職。但爲校事照常奔波。身雖在英。而心固未嘗一刻離此間也。昨噩電傳來。

謂 公於十二月三日棄養於英邸·享年八旬晉二·遺司夫人·子三·女二·女  
早適望族·三子俱爲醫界聞人·總計 公在滿服務垂四十年·立院興學·博施  
濟衆· 公所創立之盛京施醫院·現每年門診患者十餘萬·住院床位三百餘·  
經 公設立之奉天醫科專門學校·畢業已達十三班·畢業士計二百六十餘人·  
散遍全國·救濟災黎· 公以一異國之平民·在吾滿境能造成此絕大慈善教育  
事業·吾人思之能無愧感·今 公逝矣·但 公之逝者爲音容·而 公之豐功  
偉業·將與我滿洲同其終永· 公之精神固當歷千秋而不朽也·高山仰止·景  
行行止· 司公其謂乎·斯爲傳· 一九三六·十二·十·

